



শাহজালাল বিজ্ঞান ও প্রযুক্তি বিশ্ববিদ্যালয়, সিলেট

শিক্ষক, ছাত্র, কর্মকর্তা ও কর্মচারীদের যৌন হয়রানি ও নিপীড়ন নিরোধের জন্য আচরণ বিধি ২০১০

১। আচরণ বিধির উদ্দেশ্য, শিরোনাম ও সূচনা :

যেহেতু গণপ্রজাতন্ত্রী বাংলাদেশের সংবিধান ধর্ম, বর্ণ, বয়স, পেশা ও লিঙ্গ নির্বিশেষে বাংলাদেশে অবস্থানরত সকলের জন্য সমান সুযোগ নিশ্চিত করার অঙ্গীকার করেছে,

যেহেতু কোনো হয়রানি ও নিপীড়ন, যা একজন ব্যক্তির মানসিক ও শারীরিক ক্ষতি করে এবং তাঁর সমান সুযোগ গ্রহণে বাধা সৃষ্টি করার কারণে নিশ্চিতভাবেই সংবিধান বিরোধী এবং একই সঙ্গে ফৌজদারি অপরাধ,

যেহেতু কেউ যদি তাঁর পেশাগত ও সামাজিক অবস্থান ব্যবহার করে তাঁর অধীনস্থ ও নির্ভরশীল কারও ওপর এ ধরনের নিপীড়ন করে তবে সেই অপরাধ আরও নিকৃষ্ট,

যেহেতু বিভিন্ন উচ্চশিক্ষা প্রতিষ্ঠানের অধ্যাদেশ, বিধি-বিধান ও ব্যবস্থাবলি, শিক্ষক, শিক্ষার্থী, কর্মকর্তা, কর্মচারী, কর্মরত ব্যক্তি, ভর্তিচ্ছু শিক্ষার্থী এবং অভ্যাগতদেরও শিক্ষার সুষ্ঠু পরিবেশ নিশ্চিত করতে বাধ্য,

যেহেতু যেকোনো রকম হয়রানি এবং নিপীড়নের ঘটনায় আক্রান্ত ব্যক্তি নিদারুণভাবে ক্ষতিগ্রস্ত হয় এবং তন্মধ্যে গুরুতর হচ্ছে যৌন হয়রানি ও নিপীড়ন,

যেহেতু হয়রানি ও নিপীড়ন এবং যৌন হয়রানি ও নিপীড়ন একজন ব্যক্তিকে-

- চিরজীবনের জন্য ক্ষতিগ্রস্ত করে,
- তাঁকে মানসিকভাবে বিপর্যস্ত করে এবং তার মানসিক বিকাশ বাধাগ্রস্ত করে,
- তাঁর ওপর স্থায়ী মানসিক চাপ সৃষ্টি করে,
- তাঁর মর্যাদাবোধে আঘাত করে,
- তাঁর আত্মবিশ্বাস ও আত্মসম্মান বা আত্মপ্রত্যয়হানি করে,
- শিক্ষা বা পেশার ক্ষেত্রে বিঘ্ন সৃষ্টি করে, কিংবা তাঁকে চিরস্থায়ীভাবে শিক্ষা বা পেশা ত্যাগে বাধ্য করে, এমনকি বাস্তব এবং দেশ ত্যাগে বাধ্য করে,
- জীবন সংশয় সৃষ্টি করে বা স্থায়ী শারীরিক ক্ষতির সৃষ্টি করে, এমনকি জীবনহানি করে,
- পরিবার ও স্বজনদের জীবন বিপর্যস্ত করে,
- পরিবার, সমাজ ও প্রতিষ্ঠানে নিরাপত্তা এবং মর্যাদা নিয়ে জীবন-যাপনের অনিশ্চয়তা সৃষ্টি করে,

যেহেতু শাবিপ্রবি প্রতিষ্ঠানের সর্বস্তরে সুষ্ঠু পরিবেশ নিশ্চিত করতে সংশ্লিষ্ট সকলে অঙ্গীকারাবদ্ধ, যেখানে সকল শিক্ষক, শিক্ষার্থী, কর্মকর্তা, কর্মচারী, কর্মরত ব্যক্তি, ভর্তিচ্ছু এবং অভ্যাগত কোনো রকম প্রতিবন্ধকতা ছাড়াই নির্বিশেষে নিজ নিজ কর্মক্ষমতা ও সম্ভাবনা বিকশিত করতে পারে; এর জন্য কোনো ব্যক্তি যাতে এক্ষেত্রে কোনো প্রতিবন্ধকতা সৃষ্টি করতে না পারে, সে জন্য আইনগত ও প্রশাসনিক রক্ষাকবচ নিশ্চিত করতে শাবিপ্রবি সচেষ্ট,

যেহেতু বিদ্যমান আইন, অধ্যাদেশ, বিধি-বিধান ও ব্যবস্থাবলি প্রয়োজনের তুলনায় অপ্রতুল ও যথেষ্ট কার্যকর বলে প্রতীয়মান না হওয়ায় 'যৌন হয়রানি ও নিপীড়ন নিরোধে একটি আচরণ বিধি' প্রণয়ন করা একান্ত আবশ্যিক,

যেহেতু এই বিষয়ে যথাযথ আইনগত ও প্রশাসনিক ব্যবস্থা থাকা অতি আবশ্যিক বিধায় শাহজালাল বিজ্ঞান ও প্রযুক্তি বিশ্ববিদ্যালয়ের জন্য একটি কার্যকর এই আচরণ বিধি প্রণীত হলো।

২। আচরণবিধির লক্ষ্য ও আওতা :

সকল প্রকার যৌন হয়রানি নিপীড়ন দমনের লক্ষ্যে এই আচরণবিধি প্রণয়ন করা হলো-

(ক) যৌন হয়রানি ও নিপীড়ন যে একটি দণ্ডনীয় গুরুতর অপরাধ সেটা নির্দিষ্ট করা,

(খ) যে বা যারা ক্ষতিগ্রস্ত, তার বা তাদেরসহ সকলের মধ্যে নিরাপত্তাবোধ এবং বিচারের প্রতি আস্থা সৃষ্টি করা,

(গ) প্রথম থেকেই যাতে সকলেই এই অপরাধের পরিণাম এবং অপরাধ করলে কী দায় বহন করতে হবে সে সম্পর্কে সতর্ক থাকে, সে সম্পর্কে অবগত করা,

(ঘ) আক্রান্তদের, ক্ষতিগ্রস্তদের ও ভুক্তভোগীদের জন্য প্রতিকারের ব্যবস্থা করা, এবং

(ঙ) শাবিপ্রবিসহ সকল উচ্চশিক্ষা প্রতিষ্ঠানের সর্বস্তরে জনসচেতনতা সৃষ্টি করা।

২.১। এই আচরণবিধির বিশেষ লক্ষ্য থাকবে-

ক. অভিযোগ প্রদানের নিরাপদ ও সহজ ব্যবস্থা নিশ্চিত করা,

খ. অপরাধীদের উপযুক্ত শাস্তি প্রদানের ব্যবস্থা করা,

গ. অভিযোগকারী ও সাক্ষীসহ সকলের নিরাপত্তা বিধানের আইনগত ও প্রাতিষ্ঠানিক ব্যবস্থা নিশ্চিত করা,

ঘ. বিচারের ব্যবস্থা সুনির্দিষ্ট ও ত্বরান্বিত করা,

ঙ. বিচার প্রার্থী/প্রার্থীদের বা তার/তাদের পরিবারের সদস্যদের হয়রানি, হেয় ও নিগূহীত করাকে শাস্তিযোগ্য অপরাধ হিসেবে সুনির্দিষ্ট করা এবং

চ. উদ্দেশ্যমূলকভাবে সাজানো অভিযোগ সম্পর্কে প্রয়োজনীয় ব্যবস্থা গ্রহণ করা।

২.২ আচরণ বিধির আওতা-

শাহজালাল বিজ্ঞান ও প্রযুক্তি বিশ্ববিদ্যালয়ের সাথে সংশ্লিষ্ট এবং সীমানার মধ্যে কর্মরত শিক্ষক, শিক্ষার্থী, কর্মকর্তা, কর্মচারী, কর্মরত ব্যক্তি, ভর্তিচ্ছু এবং অভ্যাগত যে কোনো ব্যক্তির ক্ষেত্রে এই নীতিমালা প্রযোজ্য হবে-

ক. শাবিপ্রবি প্রতিষ্ঠান ও সংযুক্ত স্কুল, কলেজ ও মাদ্রাসা/মক্তবের শিক্ষকবৃন্দ,

১. শাবিপ্রবি প্রতিষ্ঠানের সীমানা :

পাঠক্রম ও পাঠক্রম-সহায়ক শিক্ষাদানের কাজে এবং আনুষঙ্গিক প্রশাসনিক ও অন্যান্য কাজে ব্যবহৃত শাবিপ্রবির প্রতিষ্ঠান চত্বর, নিজস্ব মালিকানাধীন ও ভাড়া করা ঘর-বাড়ি ও ঘর-বাড়ির অংশ বিশেষ, সুযোগ সুবিধা ও উপকরণাদি পরিচালনাধীন এবং অনুমোদিত হল- হোস্টেলসহ আবাসিক ব্যবস্থা এবং বাংলাদেশের ভিতরে ও বাইরে অনুমোদিত পাঠ্যসূচি ও পাঠক্রমের অন্তর্ভুক্ত পাঠদান ও মাঠকর্মে যে কোনো স্থান।

- খ. শাবিপ্রবি প্রতিষ্ঠান ও সংযুক্ত স্কুল, কলেজ ও মাদ্রাসা/মজবের শিক্ষার্থী,
- গ. শাবিপ্রবি প্রতিষ্ঠান ও সংযুক্ত স্কুল, কলেজ ও মাদ্রাসা/মজবের কর্মকর্তা-কর্মচারীবৃন্দ,
- ঘ. শাবিপ্রবি প্রতিষ্ঠান এলাকায় কর্মরত বিভিন্ন পেশার মানুষ,
- ঙ. বিভিন্ন কারণে শাবিপ্রবি প্রতিষ্ঠানে বসবাসকারী সকল মানুষ,
- চ. শাবিপ্রবি প্রতিষ্ঠান এবং এর সঙ্গে সংযুক্ত স্কুল, কলেজ ও মাদ্রাসা/মজবে ভর্তিচ্ছু শিক্ষার্থী বা তাদের সঙ্গীরা,
- ছ. শাবিপ্রবি প্রতিষ্ঠানের মধ্য দিয়ে যাতায়াতকারী কিংবা কোনো উদ্দেশ্যে আগত নারী-পুরুষ (বিশেষত যদি যাতায়াতের বা অবস্থানের সময়কালে কোনো ঘটনা সংঘটিত হয়),
- জ. শাবিপ্রবি প্রতিষ্ঠানে চাকুরি এবং কর্মের সন্ধানে আগত ব্যক্তি বা ব্যক্তিবর্গ, এবং
- ঝ. তবে অভিযোগকারী ও অভিযুক্ত উভয়েই অভ্যাগত হলে এই নীতিমালা তাদের ক্ষেত্রে প্রযোজ্য হবে না। সেক্ষেত্রে বিষয়টি আইন প্রয়োগকারী সংস্থার কাছে হস্তান্তর করা হবে।

৩। সংজ্ঞা :

৩.১ যৌন হয়রানি ও নিপীড়ন বলতে বুঝায়-

- ক. শ্রেণি কক্ষের ভিতরে বা বাইরে অবাঞ্ছিত মন্তব্য বা অঙ্গভঙ্গি দ্বারা ব্যঙ্গ-বিদ্রোপ,
 - খ. যৌন ইঙ্গিতপূর্ণ বা অশোভন অঙ্গভঙ্গি, কটুক্তি, টিটকারি, ব্যঙ্গ-বিদ্রোপ, চলাফেরার সময় পিছু নেওয়া, ইত্যাকার আচরণের মাধ্যমে উত্ত্যক্ত করা,
 - গ. চিঠিপত্র, টেলিফোন, মোবাইল ফোন, ই-মেইল, এসএমএস, পোস্টার, দেয়াল লিখন, বেঞ্চ/চেয়ার/ টেকিল/নোটিশ বোর্ড লিখন, নোটিশ, কার্টুন ইত্যাদির মাধ্যমে হেয় করা, উত্ত্যক্ত করার চেষ্টা বা উত্ত্যক্ত করা,
 - ঘ. যৌন উচ্চনিমূলক, বিদ্বেষমূলক বা উদ্দেশ্যমূলকভাবে কুৎসা রটনা করা এবং/অথবা তদুদ্দেশ্যে ছায়াছবি, স্থির চিত্র, ডিজিটাল ইমেজ, চিত্র, কার্টুন, প্রচার এবং স্থির বা ভিডিও চিত্র ধারণ, প্রেরণ, প্রদর্শন ও প্রচার,
 - ঙ. লিঙ্গীয় ধারণা থেকে কিংবা যৌন হয়রানির উদ্দেশ্যে শিক্ষা, খেলাধুলা, সাংস্কৃতিক ও সাংগঠনিক তৎপরতা বা শিক্ষা বহির্ভূত ব্যক্তিগত কাজে বাধা প্রদান,
 - চ. শ্রেণি কক্ষের ভিতরে বা বাইরে শিক্ষক/শিক্ষার্থী কর্তৃক শিক্ষক/শিক্ষার্থীকে লক্ষ্য করে অপ্রাসঙ্গিক, যৌন বিষয় উত্থাপন করে হয়রানিমূলক আচরণ করা,
 - ছ. যৌন হয়রানির উদ্দেশ্যে কুৎসা রটনা ও চরিত্র হননের চেষ্টা,
 - জ. নবীন শিক্ষার্থীদের বিভিন্ন মাত্রায় যৌন হয়রানি,
 - ঝ. বলপূর্বক প্রেমের সম্মতির জন্য উত্ত্যক্ত করা বা প্রেমের প্রস্তাব প্রত্যাখ্যানের কারণে চাপসৃষ্টি ও হুমকি প্রদান করা,
 - ঞ. যৌন আক্রমণের হুমকি বা ভয় দেখিয়ে কোনো কিছু করতে বাধ্য করা বা ভয়ভীতি প্রদর্শনের মাধ্যমে স্বাভাবিক জীবনযাপন, শিক্ষা বা কর্মজীবন ব্যাহত করা,
 - ট. ভয়/প্রলোভন দেখিয়ে বা নিজের পেশাগত বা প্রশাসনিক ক্ষমতাকে অপব্যবহার করে কারও সঙ্গে যৌন সম্পর্ক স্থাপনের চেষ্টা কিংবা স্থাপন,
 - ড. ধর্ষণের চেষ্টা কিংবা ধর্ষণ, এবং
 - ঢ. পর্নোগ্রাফি প্রদর্শনের চেষ্টা করা কিংবা করা।
- ৩.২ ধর্ম, বর্ণ, সম্প্রদায় ও লিঙ্গভেদের কারণে/সুযোগে প্রত্যক্ষ কিংবা পরোক্ষ কোনো কাজ কিংবা ব্যবহার বা আচরণ যা যৌন কামনা ও আকাঙ্ক্ষা হতে উদ্ভূত তা এই আচরণ বিধির আওতায় আসবে।

৪। সচেতনতা ও জনমত গঠন

- ক. যৌন হয়রানি ও নিপীড়ন দমনের জন্য এবং তদুদ্দেশ্যে নিরাপদ পরিবেশ তৈরির জন্য শাবিপ্রবি প্রতিষ্ঠান প্রচার ও প্রকাশনা ক্ষেত্রে বিশেষ গুরুত্ব আরোপ করবে। প্রতি শিক্ষাবর্ষে নতুন বর্ষের ক্লাস শুরু প্রাক্কালে এ বিষয়ে দিক নির্দেশনামূলক ক্লাসসহ সকল হল, হোস্টেল, অফিস ও বিভাগে এই আচরণবিধিসহ এই বিষয়ে ব্যাপক প্রচার করবে।
- খ. এই আচরণবিধির সারসংক্ষেপ, এবং প্রত্যাশিত আচরণ-সম্বলিত একটি পুস্তিকা শাবিপ্রবি প্রতিষ্ঠানে ভর্তিকৃত সকল নতুন শিক্ষার্থী এবং নতুন নিয়োগপ্রাপ্ত সকল শিক্ষক, কর্মকর্তা এবং কর্মচারীর মধ্যে বিতরণ করা হবে।
- গ. শাবিপ্রবি প্রতিষ্ঠান প্রয়োজনবোধে সংশ্লিষ্ট ব্যক্তিকে কাউন্সেলিং সেবা প্রদানের ব্যবস্থা গ্রহণ করবে।
- ঘ. বাংলাদেশের সংবিধানের মৌলিক অধিকারের অনুচ্ছেদাবলি অনুযায়ী সকলের মতপ্রকাশ, চলাফেরা, পড়াশোনা ও কাজের নিশ্চয়তা বিধানের জন্যও যথাযথ সচেতনতা ও জনমত গঠনের প্রক্রিয়া অব্যাহত রাখবে।
- ঙ. আইনশৃঙ্খলা রক্ষাবাহিনীর সদস্যদের মধ্যে এই বিষয়ে সচেতনতা বৃদ্ধির লক্ষ্যে শাবিপ্রবি প্রতিষ্ঠান স্থানীয় প্রশাসনের সাথে মত বিনিময় ও যোগাযোগ রক্ষা করার উদ্যোগ গ্রহণ করবে।

৫। যৌন হয়রানি ও নিপীড়ন নিরোধকেন্দ্রের গঠন ও কার্যপ্রণালী :

শাবিপ্রবি প্রতিষ্ঠানে অভিযোগ গ্রহণ, আনুষঙ্গিক তদন্ত ও সুপারিশ প্রণয়নের জন্য সংশ্লিষ্ট কর্তৃপক্ষ কেন্দ্রীয়ভাবে একটি নিরোধ কেন্দ্র গঠন করবে।

১. এতদপরবর্তীতে এই আচরণবিধিতে নিরোধকেন্দ্র বলতে যৌন হয়রানি ও নিপীড়ন নিরোধ কেন্দ্রকে বুঝায়।

৫.১ অভিযোগ প্রদান বিষয়ক সাধারণ জ্ঞাতব্য-

- ক. নিরোধকেন্দ্র/পরিচালনা কমিটি কর্তৃক অভিযোগকারী/দের নাম পরিচয়ের গোপনীয়তার নিশ্চয়তা থাকবে এবং অভিযোগ প্রমাণিত না হওয়া পর্যন্ত অভিযুক্ত/দের নাম পরিচয়েরও গোপনীয়তার নিশ্চয়তা থাকবে। তবে উল্লেখ থাকে যে, উভয়পক্ষের নিজ নিজ পরিচয় প্রকাশের অধিকার অক্ষুণ্ণ থাকবে।
- খ. সংশ্লিষ্ট কর্তৃপক্ষ তার নিজস্ব প্রক্টোরিয়াল বডি বা সমপ্রকারের শৃঙ্খলা-ব্যবস্থাদীনে অভিযোগকারী/দের নিরাপত্তা নিশ্চিত করতে সচেষ্ট হবে,
- গ. ক্ষতিগ্রস্ত ব্যক্তি নিজে শারীরিকভাবে উপস্থিত না হতে পারলে তাঁর আত্মীয়, বন্ধু বা আইনজীবীর মাধ্যমে অভিযোগকারীর স্বাক্ষরকৃত অভিযোগ দাখিল করতে পারবে,
- ঘ. নিরাপত্তার সমস্যা থাকলে রেজিস্ট্রার ডাকযোগে অভিযোগ প্রেরণ করা যাবে,
- ঙ. অভিযোগকারী নারী হলে অভিযোগ কেন্দ্রের সঙ্গে যুক্ত নারী সদস্যের কাছে আলাদাভাবে অভিযোগ জমা দিতে পারবেন।

৫.২ যৌন হয়রানি ও নিপীড়ন নিরোধকেন্দ্র গঠন-

ক. নিরোধকেন্দ্রের পরিচালনা কমিটি দুই বছর মেয়াদি হবে। তবে যুক্তিসঙ্গত কারণে, যথা- কোনো সদস্যের শিক্ষা প্রতিষ্ঠান ত্যাগ, বিদেশ গমন, অসুস্থতা-সংশ্লিষ্ট কর্তৃপক্ষ নিরোধকেন্দ্রের পরিচালনা কমিটির মেয়াদ পূর্ণ হওয়ার আগেই উক্ত কমিটি পুনর্নির্নয়ন করতে পারবে।
 খ. নিরোধকেন্দ্রের পরিচালনা কমিটি হবে সাত সদস্যবিশিষ্ট এবং গ্রহণযোগ্য ও আস্থাভাজন ব্যক্তিবর্গ পরিচালনা কমিটির সদস্য হিসাবে শাবিপ্রবি প্রতিষ্ঠান কর্তৃক মনোনীত হবেন; কমিটি গঠনের পর সদস্যদের নাম বাংলাদেশ বিশ্ববিদ্যালয় মঞ্জুরী কমিশনকে অবহিত করবে।
 গ. সাতজন সদস্যের মধ্যে ন্যূনতম তিনজন নারী সদস্য থাকবেন। ন্যূনতম চারজন সদস্যের উপস্থিতিতে কমিটি সভা পরিচালনা করতে পারবেন তন্মধ্যে দুইজন নারী সদস্যের উপস্থিতি বাঞ্ছনীয়,

নিরোধকেন্দ্রের পরিচালনা কমিটির গঠন হবে নিম্নরূপ-

১. শাবিপ্রবি প্রতিষ্ঠানে কর্মরত অধ্যাপক/সহযোগী অধ্যাপক পদমর্যাদাসম্পন্ন তিন জন শিক্ষক; তন্মধ্যে দুই জন নারী সদস্য।
২. শাবিপ্রবি প্রতিষ্ঠানের সঙ্গে পেশাগত দায়িত্বে নিয়োজিত নয় এবং যৌন হয়রানি ও নিপীড়ন বিষয়ক আইন সহায়তা প্রদানে অভিজ্ঞ একজন আইনজীবী।
৩. প্রতিষ্ঠিত ও দীর্ঘ সময় ধরে যৌন হয়রানি ও নিপীড়ন সম্পর্কিত কাজে অভিজ্ঞ কোনো নারী অধিকার/মানবাধিকার সংস্থা কর্তৃক মনোনীত একজন প্রতিনিধি।
৪. বাংলাদেশ বিশ্ববিদ্যালয় মঞ্জুরী কমিশন কর্তৃক মনোনীত কমিশনের একজন সদস্য অথবা তার প্রতিনিধি।
৫. বাংলাদেশ বিশ্ববিদ্যালয় মঞ্জুরী কমিশন কর্তৃক মনোনীত সংশ্লিষ্ট উচ্চশিক্ষা প্রতিষ্ঠান বহির্ভূত কোনো সরকারি বিশ্ববিদ্যালয়ের অধ্যাপক/সহযোগী অধ্যাপক পদমর্যাদাসম্পন্ন একজন প্রতিনিধি।

(২নং থেকে ৫ নং ক্যাটাগরি সদস্যের মধ্যে একজন নারী সদস্য থাকবেন, যার আইন পেশায় ডিগ্রি থাকতে হবে)

শাবিপ্রবি প্রতিষ্ঠানের তিনজন সদস্যের মধ্য থেকে কর্তৃপক্ষ একজনকে আহ্বায়ক ও অন্য একজনকে সদস্য-সচিব হিসাবে মনোনয়ন দিবেন। সদস্য-সচিব নিরোধকেন্দ্রের দাপ্তরিক কাজ সম্পাদন করবেন।
 ঘ. শাবিপ্রবি প্রতিষ্ঠানে নিরোধকেন্দ্রের কার্যক্রমের অংশ হিসাবে মানসিক স্বাস্থ্য কাউন্সেলিং সেবা প্রদানের প্রয়োজনীয় ব্যবস্থা গ্রহণ করবে। এই সেবার আওতায় সাইকোথেরাপির ওপর প্রশিক্ষণপ্রাপ্ত কাউন্সেলর সেবাদান করবেন। যারা উচ্চশিক্ষা প্রতিষ্ঠানে যৌন হয়রানির শিকার হবেন তারা এই কেন্দ্রে যোগাযোগ করে সাইকোথেরাপির সাহায্য গ্রহণ করবেন। এই কেন্দ্রে কর্মরত ব্যক্তিবর্গ নিজস্ব রেকর্ড রাখবেন।
 তবে তিনি এ ব্যাপারে সম্পূর্ণ গোপনীয়তা রক্ষা করবেন। বিশেষ প্রয়োজনে অর্থাৎ অভিযোগ প্রমাণের লক্ষ্যে নিরোধকেন্দ্রের পরিচালনা কমিটির সদস্যগণ মানসিক স্বাস্থ্য কাউন্সিলরের সাথে যোগাযোগ রক্ষা করবেন।

৫.৩ যৌন হয়রানি ও নিপীড়ন নিরোধ কেন্দ্রের কার্যপ্রণালী-

সাধারণভাবে ঘটনার ত্রিশ কার্যদিবসের মধ্যে নিরোধকেন্দ্রে অভিযোগ দাখিল করতে হবে।

নিরোধ কেন্দ্র অভিযোগ যাচাইয়ে-

(১) বিষয়টি সমাধান করার মত হলে সাধারণভাবে ৩.১ (ক) (খ) (গ) (ঘ) (ঙ) এবং (চ) শ্রেণির অভিযোগ

নিরোধকেন্দ্রের পরিচালনা কমিটি নিষ্পত্তি করবে এবং সংশ্লিষ্ট কর্তৃপক্ষকে লিখিত রিপোর্ট দিবে।

(২) অভিযোগের গুরুত্ব বিবেচনায় যদি উপযুক্ত পদ্ধতিতে নিষ্পত্তিযোগ্য না হয় তবে সর্বোচ্চ সাত কার্যদিবসের মধ্যে তা সাধারণ হয়রানি ও নিপীড়নের শাবিপ্রবি প্রতিষ্ঠানের শৃঙ্খলা রক্ষা কমিটির নিকট ন্যস্ত করবে এবং যৌন হয়রানি ও নিপীড়নের ক্ষেত্রে শাবিপ্রবি প্রতিষ্ঠানের নিরোধকেন্দ্রের পরিচালনা কমিটি আনুষঙ্গিক তদন্ত ও সুপারিশ প্রণয়নের জন্য যথাবিহিত ব্যবস্থা গ্রহণ করবে।

ঙ. নিরোধকেন্দ্রের পরিচালনা কমিটি তদন্ত করার জন্য পক্ষগণকে এবং সাক্ষীগণকে যথাযথভাবে নোটিশ প্রদান, প্রয়োজনীয় শুনানি, তথ্য-সাক্ষ্য-প্রমাণ সংগ্রহ, এবং বিশ্ববিদ্যালয়ের বিভিন্ন পর্যায়ের দলিলপত্র পর্যালোচনা করার অধিকারী হবে। যেহেতু এ জাতীয় অভিযোগে প্রত্যক্ষ সাক্ষ্য-প্রমাণ কম থাকে, তাই প্রত্যক্ষ সাক্ষ্য প্রমাণাদি ছাড়াও পারিপার্শ্বিক সাক্ষ্য-প্রমাণাদির ওপর জোর দিতে হবে। নিরোধ কমিটির কাজ সূষ্ঠভাবে পরিচালনা করার জন্য বিশ্ববিদ্যালয়ের সংশ্লিষ্ট অফিস চাহিবামাত্র সকল সহযোগিতা প্রদানে বাধ্য থাকবে। নিরোধকেন্দ্র অভিযোগকারী/দের পরিচয় গোপন রাখবে। সাক্ষ্য গ্রহণকালে অভিযোগকারী/দেরকে উদ্দেশ্য প্রণোদিতভাবে কোনো প্রকার হেয়, নিঃসহ, হয়রানিমূলক প্রশ্ন এবং আচরণ করা যাবে না। প্রত্যক্ষ সাক্ষ্য প্রদানে কেউ সমস্যা বোধ করলে পরিচয় গোপন রেখে বা পরোক্ষভাবে যাতে তথ্য সরবরাহ করতে পারে তার ব্যবস্থা রাখতে হবে। অভিযোগ করার পর যদি অভিযোগকারী অভিযোগ প্রত্যাহার বা অভিযোগের তদন্ত বন্ধের আবেদন করেন তবে এর কারণ অনুসন্ধানপূর্বক রিপোর্ট উল্লেখ করতে হবে।

নিরোধকেন্দ্র সর্বোচ্চ ত্রিশ কার্যদিবসের মধ্যে তদন্ত কাজ শেষ করে কমিটির রিপোর্ট এবং অভিযোগ প্রমাণিত হলে অপরাধের মাত্রা অনুযায়ী অপরাধীর শাস্তির নির্দিষ্ট সুপারিশ সংশ্লিষ্ট কর্তৃপক্ষকে প্রদান করবে, তবে বিশেষ যৌক্তিক কারণে তদন্তের সময়কাল সর্বোচ্চ ষাট কার্যদিবস পর্যন্ত বর্ধিত করা যেতে পারে।

চ. যদি প্রমাণিত হয় যে, উদ্দেশ্যমূলকভাবে কেউ সাজানো অভিযোগ উত্থাপন করেছেন, তাহলে অপরাধের মাত্রা অনুযায়ী অভিযুক্ত ব্যক্তি যে শাস্তি ভোগ করতেন মিথ্যা অভিযোগকারীর বেলায় অনুরূপ শাস্তির সুপারিশ করে সংশ্লিষ্ট কমিটি কর্তৃপক্ষের নিকট রিপোর্ট জমা দিবে। বিশ্ববিদ্যালয় উক্ত সিদ্ধান্ত বাস্তবায়ন করবে। নিরোধকেন্দ্রের পরিচালনা কমিটি সদস্যদের সর্বসম্মতিতে, অন্যথায় সংখ্যাগরিষ্ঠ সদস্যদের মতানুযায়ী সিদ্ধান্ত গ্রহণ করবে।

৬। শাস্তি

নিরোধকেন্দ্রের সুপারিশ অনুযায়ী সংশ্লিষ্ট কর্তৃপক্ষ সর্বোচ্চ ষাট কার্যদিবসের মধ্যে সকল পর্যায় শেষ করতে এবং অপরাধীর শাস্তি সম্পর্কে সিদ্ধান্ত প্রদান করবেন। নিরোধকেন্দ্র কর্তৃপক্ষ কোন অভিযোগের তদন্ত চলাকালে নিষ্পত্তি না হওয়া পর্যন্ত অভিযুক্ত শিক্ষক, কর্মকর্তা বা কর্মচারীকে সাময়িকভাবে সকল দায়িত্ব থেকে এবং শিক্ষার্থীকে সাময়িকভাবে শিক্ষা কার্যক্রম থেকে বিরত রাখতে হবে।

৬.১ অপরাধী যদি শিক্ষার্থী হন তবে অপরাধের মাত্রা অনুযায়ী নিম্নোক্ত যে কোন শাস্তি দেয়া যাবে-

ক. মৌখিক সতর্কীকরণ,

খ. লিখিত সতর্কীকরণ,

গ. লিখিত সতর্কীকরণ ও তা ক্যাম্পাসে সর্বত্র প্রচার,

ঘ. এক বছরের জন্য বহিষ্কার ও প্রচার,

ঙ. দুই বছরের জন্য বহিষ্কার ও প্রচার,

চ. চিরতরে বহিষ্কার ও প্রচার,

ছ. সকল শিক্ষা ও কর্ম প্রতিষ্ঠানে এ বিষয়ক তথ্য সরবরাহ এবং রাষ্ট্রীয় আইনের অধীনে যথোপযুক্ত শাস্তি প্রদানের জন্য পুলিশের কাছে হস্তান্তর।

৬.২ অপরাধী যদি কর্মকর্তা বা কর্মচারী হন তাহলে অপরাধের মাত্রা বিবেচনা করে নিম্নোক্ত যে কোনো শাস্তি দেয়া যাবে-

ক. মৌখিক সতর্কীকরণ,

খ. লিখিত সতর্কীকরণ,

গ. লিখিত সতর্কীকরণ ও তা ক্যাম্পাসসহ গণমাধ্যমে

প্রচার,

ঘ. অভিযুক্ত/দের ইনক্রিমেন্ট বন্ধসহ আর্থিক সুবিধা খর্ব করা ও মাত্রাবিশেষ অভিযোগকারী/দেরকে আর্থিক ক্ষতিপূরণ প্রদান,

ঙ. অপরাধী/দের পদাবনতি ও অভিযোগকারী/দেরকে আর্থিক ক্ষতিপূরণ প্রদান,

- চ. বাধ্যতামূলক অবসর বা চাকুরিচ্যুতি,
 ছ. অপরাধী/দের চাকুরিচ্যুতি ও অভিযোগকারী/ দেরকে আর্থিক ক্ষতিপূরণ প্রদান,
 জ. নৈতিক অসচ্চরিত্রতার দায়ে চাকুরিচ্যুতি এবং শাস্তির বিষয়ে কার্যকরী ব্যবস্থা গ্রহণের জন্য অন্যান্য সকল সমজাতীয় প্রতিষ্ঠানে অবহিত করা,
 ঝ. নৈতিক অসচ্চরিত্রতার দায়ে চাকুরিচ্যুতি এবং শাস্তির বিষয়ে কার্যকরী ব্যবস্থা গ্রহণের জন্য অন্যান্য সকল জাতীয় প্রতিষ্ঠানে অবহিত করা,
 ঞ. চাকুরিচ্যুতি এবং রাষ্ট্রীয় আইনের অধীনে যথোপযুক্ত শাস্তি প্রদানের জন্য পুলিশের কাছে হস্তান্তর।
 ৬.৩. অপরাধী যদি শিক্ষক হন তাহলে অপরাধের মাত্রা বিবেচনা করে নিম্নোক্ত যে কোন শাস্তি দেয়া যাবে :
 ক. মৌখিক সতর্কীকরণ,
 খ. লিখিত সতর্কীকরণ,
 গ. লিখিত সতর্কীকরণ ও তা ক্যাম্পাসসহ গণমাধ্যমে প্রচার,
 ঘ. নির্দিষ্ট কোর্সসমূহে পাঠদান, পরীক্ষার কাজ এবং সকল প্রশাসনিক দায়িত্ব থেকে অব্যাহতি,
 ঙ. অভিযুক্ত/দের ইনক্রিমেন্ট বন্ধসহ আর্থিক সুবিধা খর্ব করা ও ক্ষেত্রবিশেষ অভিযোগকারী/ দেরকে আর্থিক ক্ষতিপূরণ প্রদান,
 চ. অপরাধী/দের পদাবনতি ও ক্ষেত্রবিশেষ অভিযোগকারী/ দেরকে আর্থিক ক্ষতিপূরণ প্রদান,
 ছ. বাধ্যতামূলক অবসর বা চাকুরিচ্যুতি,
 জ. অপরাধী/দের চাকুরিচ্যুতি ও অভিযোগকারী/ দেরকে আর্থিক ক্ষতিপূরণ প্রদান,
 ঝ. নৈতিক অসচ্চরিত্রতার দায়ে চাকুরিচ্যুতি এবং শাস্তির বিষয়ে কার্যকরী ব্যবস্থা গ্রহণের জন্য অন্যান্য সকল সমজাতীয় প্রতিষ্ঠানে অবহিত করা,
 ঞ. নৈতিক অসচ্চরিত্রতার দায়ে চাকুরিচ্যুতি এবং শাস্তির বিষয়ে কার্যকরী ব্যবস্থা গ্রহণের জন্য অন্যান্য সকল জাতীয় প্রতিষ্ঠানে অবহিত করা,
 ট. চাকুরিচ্যুতি এবং রাষ্ট্রীয় আইনের অধীনে যথোপযুক্ত শাস্তি প্রদানের জন্য পুলিশের কাছে হস্তান্তর।
 ৬.৪ অপরাধী যদি ক্যাম্পাসে বসবাসরত বা আগত বা যাতায়াতকারী কোনো ব্যক্তি হন তাহলে অপরাধের মাত্রা বিবেচনা করে নিম্নোক্ত যে কোনো শাস্তি দেয়া যাবে-
 ক. মৌখিক সতর্কীকরণ,
 খ. লিখিত সতর্কীকরণ,
 গ. লিখিত সতর্কীকরণ ও তা ক্যাম্পাসসহ গণমাধ্যমে প্রচার,
 ঘ. ক্যাম্পাসে তার আগমন, চলাচল বা বসবাস নিষিদ্ধ করা,
 ঙ. সম্পর্কিত সকল প্রতিষ্ঠানে অবহিত করা ও রাষ্ট্রীয় আইনের অধীনে যথোপযুক্ত শাস্তি প্রদানের জন্য পুলিশের কাছে হস্তান্তর।

৭। তহবিল :

বিশ্ববিদ্যালয় কর্তৃপক্ষ অভিযোগ কেন্দ্রের ব্যয় নির্বাহের জন্য প্রয়োজনীয় অর্থ বাজেটে বরাদ্দ ও মঞ্জুর করবে।

যৌন হয়রানি ও নিপীড়ন প্রতিরোধকল্পে অভিযোগ কমিটি

যৌন হয়রানি ও নিপীড়ন প্রতিরোধকল্পে অভিযোগ কমিটি

- | | |
|--|------------|
| ১। প্রফেসর ড. সাবিনা ইসলাম
পরিসংখ্যান বিভাগ, শাবিপ্রবি
মোবাইল: ০১৯১১৭২০৫২৫, ০১৩১২০৮২০০৩
ইমেইল: profsabinaislam@gmail.com, sabina-sta@sust.edu | সভাপতি |
| ২। প্রফেসর ড. এম আব্দুল্লাহ আল মুমিন
সিএসই বিভাগ, শাবিপ্রবি | সদস্য |
| ৩। প্রফেসর মাহফুজা বেগম
সভাপতি, এশিয়াটিক সোসাইটি | সদস্য |
| ৪। এডভোকেট মোঃ আব্দুল কুদ্দুস
বার হল নং-২ জজকোর্ট, সিলেট | সদস্য |
| ৫। এডভোকেট সৈয়দা শিরিন আকতার
সিলেট বিভাগীয় প্রধান
বাংলাদেশ জাতীয় মহিলা আইনজীবী সমিতি | সদস্য |
| ৬। জনাব মৌলি আজাদ
উপ-পরিচালক
পাবলিক ম্যানেজমেন্ট বিভাগ, বিমক, ঢাকা | সদস্য |
| ৭। প্রফেসর ড. মুনতাহা রকিব
অর্থনীতি বিভাগ, শাবিপ্রবি
মোবাইল: ০১৭১৮২২২৪৫৫
ইমেইল: muntaha-eco
@sust.edu, muntaha_rakib@yahoo.com | সদস্য সচিব |
